

МЕСЯЦА НОЕМВРИА В 14-Й ДЕНЬ.

СВЯТАГО И ВСЕХВАЛЬНОГО АПОСТОЛА ФИЛИППА

НА ВЕЧЕРНИ

Блажен муж: 1-й антифон.

На Господи, возвах: стихиры апостола, на 8. Глас 6.

Подобен: Все отложше:

Деяние убо восхождение истиннаго видения, * видение же конец Боголюбиваго деяния, блаженне, положив, * Христа молил еси * Отчую славу показати тебе неизреченную, * ибо желает всякое словесное естество славне, Бога составльшаго, * и желаемаго получил еси, * того абие приемь печать Сына: * Егоже со дерзновением моли о душах наших. [Трижды.]

Божественными восхождением всегда научаемь, * яко Моисей первее, Бога видети возжелел еси * и мысленно видел еси Того образ, * приемь к подобию, * Отца бо скорое уведение Сын и указание, * Сына же и Родителя Едино Существо знается * и от всех тождество возносится честно, * и Царство, и сила, слава, и поклонение. [Трижды.]

Орган, бряцая Божественными вдохновеньми * и сказании Святаго Духа, был еси * и, премирное песнопоя в мире Спасово Евангелие * огненным языком твоим, * всю бо лесь попалил еси, * яко вещь удобосожигаему * и яко траву земную увядаему: * сущаго же над всеми Владыку и Господа Христа * вселенней проповедал еси, * Филиппе Боговидче. [Дважды.]

Слава, глас 6. Византиево:

Великаго, Филиппе, Света блистании разжегся, * всемирный возсиял еси светильник, * Отца же Светов, * в Сыне взыскав, обрел еси: * во свете бо свет обретается. * Ибо той печать равнообразна, * являя началообразное. * Егоже, апостоле, моли * запечатствованным Божественною спастися Кровию.

И ныне, Богородичен: Кто Тебе не ублажит:

Вход. Прокимен дне. И чтения 3.

Соборнаго послания Петрова чтение (зачало 58):

Петр, апостол Иисус Христов, избранным пришельцем разсеяния, Понта, Галатии, Кападокии, Азии и Вифинии, по прозрению Бога Отца во святыню Духа, в послушание и кропление Крове Иисус Христовы, благодать вам и мир да умножится. Благословен Бог и Отец Господа нашего Иисус Христа, Иже по мнозей Своей милости порождет нас во упование живо воскресением Иисус Христовым от мертвых, в наследие нетленно, и нескверно, и неувядаемо, соблюдено на Небесех вас ради, иже силою Божиею соблюдени верою во спасение готовое явитися во время последнее. О немже радуйтесь, мало ныне, аще лепо есть, прискорбни бывше в различных напастех, да искушение ваша веры, многочиснейше злата гибнуща, огнем же искушена, обрящется в похвалу и честь и славу, во откровении Иисус Христове. Егоже не видевше, любите, и на Негоже ныне не зряще, верующе же, радуетесь радостию неизглаголанною и прославленною, приемлюще кончину вере вашей спасение душам. О немже спасении взыскаша и испыташа пророцы, иже о вашей благодати прорекоша, испытующе, в каково или в кое время являше в них Дух

Христов, прежде свидетельствуя о Христовех страстех и яже по сих славах, имже открыся, яко не им самем, но нам служаху сия, яже ныне возвестишася вам, благовествовавшими вам Духом Святым, посланным с Небесе, в няже желают Ангели приинкнуги. Темже, возлюбленнии, препоясавше чресла помышления вашего, трезвящеся, совершенно уповайте на приносимую вам благодать откровением Иисус Христовым. Яко чада послушания, не преобразующеся первыми неведения вашего похотении, но по звавшему вы Святому, и сами святы во всем житии будите. Зане писано есть: святы будите, яко Аз Свят есмь. И аще Отца называете, нелицемерно судяща комуждо по делу, со страхом жития вашего время жительствуйте, ведяще, яко не истленным сребром, или златом избавистеся от суетнаго вашего жития, отцы преданнаго, но честною Кровию яко Агнца Непорочна и Пречиста Христа, предуведена убо прежде сложения мира, явльшася же в последняя лета вас ради. Иже Его ради веровавших в Бога, воздвигшаго Его из мертвых и славу Ему давша, яко да вера ваша и упование будет на Бога. Души ваша очистивше в послушание истины духом, в братолюбие нелицемерно, от чиста сердца друг друга любите прилежно, порождени не от семени истленна, но неистленна, словом Живаго Бога и пребывающа во веки. Зане всяка плоть, яко трава, и всяка слава человека, яко цвет травный. Изспе трава и цвет ея отпаде, глагол же Господень пребывает во веки, се же есть глагол благовествованный в вас. Отложше убо всяку злобу, и всяку лесть, и лицемерие, и зависть, и вся клеветы, яко новорождени младенцы, словесное и неместное млеко возлюбите, яко да о нем возрастете во спасение, понеже вкусисте, яко благ Господь. К Немуже приходяще, Камению Живу, от человек убо уничижену, от Бога же избранну, честну, и сами яко камение живо, зиждитесь в храм духовен, святительство свято, возносити жертвы духовны, благоприятны Богови Иисус Христом. Зане писано есть в Писании: се полагаю в Сионе Камень Краеуголен, избран, честен, и веруай в Онь не постыдится.

Соборнаго послания Петрова чтение (зачало 59):

Возлюбленнии, Христос пострада по нас, нам оставль образ, да последуем стопам Его. Иже греха не сотвори, ни обретеся лесть во устех Его, Иже укаряемь противу не укаряше, стражда, не прещаше, предающе же судящему праведно. Иже грехи наша сам вознесе на теле Своем на Древо, да, от грех избывше, правдою проживем, Егоже язвою исцелесте. Бесте бо, яко овцы заблуждшия, не имуща пастыря, но возвратистесь ныне к Пастырю и Посетителю душ ваших. Такожде же и жены повинующеся своим мужем, да и аще нецыи не повинуются слову, женским житием без слова пленени будут, видевше еже со страхом чисто житие ваше. Имже да есть не внешняя плетения влас, и обложения злата, или одеяния риз лепота, но потаеный сердца человек, в неистлении кроткаго и молчаливаго духа, еже есть пред Богом многоценно. Тако бо иногда и святыя жены, уповающия на Бога, украшаху себе, повинующеся своим мужем: якоже Сарра послушаша Авраама, господина того зовуща, еяже бысте чада, благодворяще и не боящеся ни единого страха. Мужие, такожде вкупе живуще с своими женами по разуму, яко немощнейшу сосуду, женскому воздающе честь, яко и снаследницы благодатныя жизни, во еже не прекращатися молитвам вашим. Конец же – вси единомудрени будите, милостиви, братолюбцы, милосердни, благоутробни, мудролюбцы, смиреномудри, не воздающе зла за зло или досаждения за досаждение, супротивное же благословяще, ведяще, яко на се звани бысте, да благословение наследите.

Соборнаго послания Петрова чтение (зачало 61):

Возлюбленнии, Христу пострадавшу за ны плотию, и вы в ту же мысль вооружитесь, зане пострадавший плотию преста от греха. Во еже не ктому в человеческия похоти, но в волю Божию прочее во плоти жити время. Довлеет бо вам мимошедшее время жития, волю языческую творившим, хождшим в нечистотах, в похотех, в скотоложстве, в помыслех, в пьянстве, в козлогласованиях, в лихоимании, и богомерзских идолослужениях. О немже дивятся, не сходящимся вам в то же блуда разлияние, хуляще: иже воздадут слово готову Сущему судити живым и мертвым. На се бо и мертвым благовестися, да Суд убо примут по человеку плотию, поживут же по Бозе Духом. Всем же кончина приближися, уцеломудритесь убо и трезвитесь в молитвах. Прежде же всех друг ко другу любовь прилежну имейте, зане любовь покрывает множество грехов. Страннолюбцы друг ко другу без роптаний. Кийждо якоже прият дарование, между себе сим служаще, яко добрии строителие различныя благодати Божия. Аще кто глаголет, яко словеса Божия, аще кто служит, яко от крепости, юже подает Бог, да о всем славится Бог Иисус Христом, Емуже есть слава и держава во веки веков, аминь.

На литии стихира храма и апостола, глас 4.

Подобен: Яко добля:

Тростию благодати * от глубины суетства человеки извлека еси, досточудне, * Учителя манием повинувся, Филиппе, * просвещаго по всему твое разумение, * и апостола, и честна Богоглагольника, * тя, всеблаженне, показавша, * Того непостижимаго Божества.

Духа сияние на тя сниде во огненне виде * и тя, блаженне, Божественное приятелище содела, * скоро отгоняща безбожия мглу * и мир просвещающа сиянием всемудрых твоих словес, * тайноглагольниче, апостолов украшение, * Христов самовидче блаженне.

Молниями проповедания * во тьме седящия неведения, славне, просветив, * показал еси сыны Владыки и Бога веры ради. * Егоже страstem ревновал еси и смерти * и славы был еси наследник, * яко мудр и Богоглаголив, * яко ученик истины.

Слава, глас 2:

Оставив земная, последовал еси Христу, * и знаменався дохновением Святаго Духа, * послан быв от Него в языки погибшия * обрати человеки во свет Богознания, * апостоле Филиппе, * и, скончав подвиги Божественныя твоя страсти * и мук различных, * душу твою Христу предал еси. * Того моли, всеблаженне, * даровати нам велию милость.

И ныне, Богородичен:

Все упование мое * на Тя возлагаю, Мати Божия, * сохрани мя под кровом Твоим.

На стиховне стихиры, глас 1.

Подобен: Небесных чинов:

Небесных твоих вещаний изглашения * на земли, всеблаженне, разгласишася, * и сию исполни догматов, * имиже Сына Отцу и Духу * Богословяще, апостоле, тайно, * Единосушна славим.

Стих: Во всю землю изыде вещание их * и в концы вселенныя глаголы их.

Яко светоносца ты вси апостолов Христовых * и светлаго светильника честныя Церкви, * Филиппе преблаженне, имуще ныне, * душами просвещаемся * и от бед злолютых избавляемся * молитвами твоими, всехвальне.

Стих: Небеса поведают славу Божию, * творение же руку Его возвещает твердь.

Крестом подвиг страдания скончавый, * победы венцы одеялся еси, Филиппе, достойне; * с нимиже, вшед в Горняя царствия, * спредстоиши, апостоле, Христу * и молишися спастися нам.

Слава, глас 2:

Чаша аромата * в мире ланиты твоя, мудре, явися, * апостоле Филиппе, * почерпающая верным пивом животворное. * Деяния бо в видения восхождение имей, * Христа последователь и приветствователь был еси, * неплодную и безчадную языков Церковь украсил еси поученьми, * благочадствующу в нем. * Ейже и ныне моли избавитися нужд и обстояний, * можещи бо о Бозе много, приближаяся Ему.

И ныне, Богородичен: О, чудесе новаго:

Тропарь, глас 3:

Благоукрашается вселенная, * Ефиопия ликовствует, * яко венцем красуема, * тобою просветившись, * светло торжествует память твою, * Богоглаголиве Филиппе, * вся бо веровати Христу научил еси * и течение совершил достойно Евангелия. * Тем дерзновенно варит Ефиопская рука к Богу, * Егоже моли даровати нам велию милость.

Слава, и ныне, Богородичен:

Тя ходатайствовавшую спасение рода нашего, * воспеваем, Богородице Дево: * плотию бо от Тебе восприятою Сын Твой и Бог наш, * Крестом восприим страсть, * избави нас от тли, яко Человеколюбец.

НА УТРЕНИ

На Бог Господь: тропарь апостола, глас 3:

Благоукрашается вселенная, * Ефиопия ликовствует, * яко венцем красуема, * тобою просветившись, * светло торжествует память твою, * Богоглаголиве Филиппе, * вся бо веровати Христу научил еси * и течение совершил достойно Евангелия. * Тем дерзновенно варит Ефиопская рука к Богу, * Егоже моли даровати нам велию милость. [Дважды.]

Слава, и ныне, Богородичен:

Тя ходатайствовавшую спасение рода нашего, * воспеваем, Богородице Дево: * плотию бо от Тебе восприятоу Сын Твой и Бог наш, * Крестом восприим страсть, * избави нас от тли, яко Человеколюбец.

По 1-й кафизме, седален, глас 1.

Подобен: Гроб Твой:

Апостоле Христов, и самовидче, * и мучениче, Филиппе премудре, * друже Божий блаженне, * иже верою празднуюция честную твою память * свободи от обдержажих прегрешений молитвами твоими * и Небесное наследие получитьи сподоби.

Слава, и ныне, Богородичен:

Купину, юже Моисей неопально виде, * гору Божию, святыи облак, сень нескверную, * Богоприятную трапезу, палату высочайшаго Царя, * всесветлую и непроходную дверь, Дево, поем Тя.

По 2-й кафизме седален, глас 5.

Подобен: Собезначальное Слово:

Ученик Словесе, истины проповедник, * яко стрела, послан был еси, просвещая сущия во тьме лютей, святе апостоле, * и безбожия мглу отгоня от земли, * и вся благоверующия сыны дне показал еси, Христов видче, святе Филиппе.

Слава, и ныне, Богородичен:

Иже упование на Тя, Дево Пречистая, непотковенное имуще, * покров сущи, от различных напастей, и обстояний, и бед лютых свободи ны, * молящи Сына Твоего со апостолы Его, * и спаси вся воспевающия Тя.

По полиелеи седален, глас 8.

Подобен: Премудрости и слова:

Идольскую леств низложил еси, * Спасовы страсти возжелев, Филиппе славне, * явился еси миру, Небесная всем источая чудеса * и языков быв, всеблаженне, апостол. * Тем твою память достойно чтим, песнословяще: * Господень апостоле, * моли Христа Бога грехов оставление даровати * празднующим любовию святую память твою.

Слава, и ныне, Богородичен:

В напасти многоплетенныя впад от враг видимых и невидимых, * бурю одержимь безчисленных согрешений моих, * и, яко к теплomu заступлению и покрову моему, Чистая, * ко пристанищу притекаю Твоя благости. * Темже, Пречистая, * из Тебе Воплощенному безсеменно молися прилежно о всех рабах Твоих, * непрестанно молящихся, Богородице Пречистая, * молящи Его присно согрешений оставление даровати * воспевающим достойно славу Твою.

Степенна, 1-й антифон 4-го гласа.

Прокимен, глас 4: Во всю землю изыде вещание их * и в концы вселенныя глаголы их.

Стих: Небеса поведают славу Божию, творение же руку Его возвещает твердь.

Всякое дыхание:

Евангелие от Иоанна, зачало 67.

Во время оно, явися Иисус учеником Своим, востав от мертвых. И глагола Симону Петру: Симоне Ионин, любиши ли Мя паче сих? Глагола Ему: ей, Господи, Ты веси, яко люблю Тя. Глагола ему: паси агнцы Моя. Глагола ему паки второе: Симоне Ионин, любиши ли Мя? Глагола ему: ей, Господи, Ты веси, яко люблю Тя. Глагола ему: паси овцы Моя. Глагола ему третье: Симоне Ионин, любиши ли Мя? Оскорбе же Петр, яко рече ему третье, любиши ли Мя; и глагола Ему: Господи, Ты вся веси, Ты веси, яко люблю Тя. Глагола ему Иисус: паси овцы Моя. Аминь, аминь, глаголю тебе, егда бе юн, поясахся сам, и хождах, аможе хотяше, егда же состареешися и воздежеш руце твои, и ин тя пояшет, и ведет, аможе не хочеш. Сие же рече, назнаменуя, коею смертию прославит Бога. И сия рек, глагола ему: иди по Мне. Обращься же Петр, виде ученика, егоже любляше Иисус, во след идуща, иже и возлеже на вечери на перси Его, и рече: Господи, кто есть предай Тя? Сего видев Петр, глагола Иисусови: Господи, сей же что? Глагола ему Иисус: аще хочу, да той пребывает, дондеже прииду, что к тебе? Ты по Мне гряди. Изыде же слово се в братию, яко ученик той не умрет, и не рече ему Иисус, яко не умрет, но аще хочу тому пребывать, дондеже прииду, что к тебе? Сей есть ученик свидетельствующий о сих, иже и написа сия, и вем, яко истинно есть свидетельство его. Суть же и ина многа, яже сотвори Иисус, яже аще по единому писана бывают, ни самому мною всему миру вместити пишемых книг. Аминь.

По 50-м псалме стихира, глас 6.

Самогласен:

Премудрый ловче, святыи учениче, * делателю Спасов и сказателю Того страстей, * иже тварь верою обтек * и прельщенныя языки собрав и Богу привед, * яко кадило доброе, на Небеса возведеса. * Темже, предстоя Судии, * моли избавитися нам от беззаконий наших * и в День Судный избавитися мучения.

Канон Богородицы со ирмосом на 6 и апостола на 8, егоже краегранесие:

Славнаго Филиппа пою благолепно. Феофан. Глас 6.

Песнь 1

Ирмос: Яко по суху, пешешествовав Израиль * по бездне стопами, * гонителя фараона * видя потопляема, * Богу победную песнь поим, вопияше.

Пресветлыми лучами Христовы Божественныя светлости наслаждаяся ясно, Богопроповедниче Филиппе, твоими по причастию зарями нас просвети.

Отчую тебе славу собою показавый, Филиппе, лику учеников тя Христос вчини, твою проведый добродетель, Богоблаженне.

Ныне не в гаданиих зриши, ниже сенех, ниже зеркалах, всемудре, Источника благих, желаний конечное, Христа, но лицом зриши явственню к лицу.

Богородичен: Оскудевшим начальником от колена Иудова, Пречистая, Сын Твой и Бог пришел, вождь земли концем истинно ныне воцарися.

Катавасия: Отверзу уста моя:

Песнь 3

Ирмос: Несть свят, * якоже Ты, Господи Боже мой, * вознесый рог верных Твоих, Блаже, * и утвердивый нас на камени * исповедания Твоего.

Ты, исполнен света деятельнаго видения, Свету великому, бывшу с нами, сподобился еси Христу служити, Филиппе Богоглаголиве.

Степень догматов благочестивых твое тайноводствие благочестиво явися, тем бо Сына познахом соестественна и соединенна суца Родителю.

Свещник был еси злат, сияя человеком присносущный свет и просвещающ им вселенную яве познанием, Филиппе всеизящнейше.

Богородичен: На Тя, Пресвятая Чистая, надевися, да не отпаду Твоего чаяния, но, яко Мати милостивная человеколюбиваго Бога, сетей мя врага избави.

Седален, глас 8.

Подобен: Премудрости:

Тученосен облак духовный истинно показался еси сущим на земли, * напаяя, яко ниву, таинственно сердца наша; * протек словом, напаяеши концы * и дождь проливаеши мира от раки. * Тем, дохнув неверным сердцам воню Духа, * в нихже сокровищствовал еси, апостоле Филиппе, * молися Христу Богу грехов оставление даровати * празднующим любовию святую память твою.

Слава, подобен тойже:

Идольскую лесьть низложил еси, * Спасовы страсти возжелев, Филиппе, славне, * явился еси миру, Небесная всем источая чудеса * и языков быв, всеблаженне, апостол. * Тем твою память достойно чтим, песнословяще: * Господень апостоле, * моли Христа Бога грехов оставление даровати * празднующим любовию святую память твою.

И ныне, Богородичен:

В напасти многоплетенная впад от враг видимых и невидимых, * бурею одержимь безчисленных согрешений моих, * и, яко к теплomu заступлению и покрову моему, Чистая, * ко пристанищу притекаю Твояя благодати. * Темже, Пречистая, * из Тебе Воплощенному безсеменно молися прилежно о всех рабах Твоих, * непрестанно молящихся, Богородице Пречистая, * молящи Его присно согрешений оставление даровати * воспевающим достойно славу Твоюю.

Песнь 4

Ирмос: Христос моя сила, * Бог и Господь, * честная Церковь * Боголепно поет, зывающи, * от смысла чиста о Господе празднующи.

Солнца селение, Христа, сущаго Света, и храм показался еси вместителен Того светлости, и Небо, славу Божию человеком поведаея.

Во истлевшее страстьми человечество ты вложен, Божия соль, от Христа, того изсуши гнилость лютую, Боговещателю достославне.

Силою, Филиппе, Христовою укрепляемь, демонскаго полка и зловерных явился еси сильнший, сущим на земли вопия жизни Божественная благовестие.

Богородичен: Пристанище благотихое Христос яви верою и любовию Тя, истинную Владычицу Всенепорочную, от совести чистыя Богородицу проповедающим.

Песнь 5

Ирмос: Божиим светом Твоим, Блаже, * утренюющих Ти души любовию озари, молюся, * Тя ведети, Слове Божий, * истиннаго Бога, * от мрака греховнаго зывающа.

Яда душегубительнаго вражия врачевными твоими дланьми, Богоглаголиве, иссушив, смертоносною глубиною держимыя лютыя болезни избавляя.

Огнедохновенен весь явился еси Параклитовым нашествием и благодатию, Филиппе, изыбшия безбожия зимою, теплотою веры оживотворил еси.

Близ был еси Христа, даемыя ти зари несредственно приемля, просвещая к тебе притекающия и приводя тыя Содетелю Твоему.

Богородичен: Словом вся содетельствуя и мудрым Промыслом окормляя един, яко хочет Господь, за благоутробие зиждется из Тебе и плоть несказанно, Пречистая, бывает.

Песнь 6

Ирмос: Ят бысть, * но не удержан в персех китовых Иона: * Твой бо образ нося, * страдавшаго и погребению давшагося, * яко от чертога, от зверя изыде, * приглашаше же кустодии, * хранящии суетная и ложная, * милость сию оставили есте.

Одержашу и губящую зря прелесть вражию человеческий род, Твоя стрелы, изошренныя апостолы, напряг, испустил еси и разверзл еси брэнная уста змиева, всех от того вреда и тли, Спасе, исцеляя.

Вышним сиянием блистая, явился еси, якоже молния, вселенней светя, и яко гора, сладость искапающая, яко роса Божественная, с Небесе падающая, яко апостол избран, дванадесятчисленный полк исполняя учеников Христовых, всеблаженне.

Научився Твоей тайны глубине, Божественный ученик, яко реку мира, наводняющую сладости поток, яко потопающую волну, славу языков, Тя проповеда велегласно и Твое славное истощание, Блаже, еже о нас благовести.

Богородичен: Умерщвляемыя и гибнущия вся смертию человеки Ты, Христа рождши – Нетленное Безсмертие, призвала еси к жизни вечней, и просветила еси омраченныя, и свободила еси, разрешивши узы отведения нашего, Всепетая.

Кондак, глас 8.

Подобен: Яко начатки:

Ученик, и друг Твой, и подражатель страсти Твоя * вселенней Бога Тя проповеда Богоглаголивый Филипп; * того молитвами от врагов пребеззаконных * Церковь Твою и всяк град Твой * Богородицею соблюди, Многомилостиве.

Икос: Струю слова подаждь ми, Господи, водное естество содеявый, сердце мое укрепи, Благоутробне, иже землю утвердивый словом Твоим, и просвети мое помышление, светом, яко ризою, одевайся, да глаголю и пою подобающая и достойно восхваляю Твоего угодника, Многомилостиве.

Песнь 7

Ирмос: **Отроцы в Вавилоне * пещнаго пламене не убояшася, * но, посреде пламене ввержени, орошаеми, пояху: * благословен еси, Господи, Боже отец наших.**

Яко свет, послался еси стрелы подобием, апостоле, светозарными блистаниями просвещающая верою зовущия: благословен еси, Господи, Боже отец наших.

Богатыми светолитиями Божественнаго, блаженне, проповедания сияя светло, во тьме сущия песнопети просветил еси: благословен еси, Господи, Боже отец наших.

Витийская бусловия и словесную всю лютость крепким словом веры победив, пел еси: благословен еси, Господи, Боже отец наших.

Богородичен: **В** естествах пресущественно, Дево, двух родила еси соединенных, Чистая, неслиянно Христа, Емуже зовем: благословен еси, Господи, Боже отец наших.

Песнь 8

Ирмос: **За законы отеческия * блаженнии в Вавилоне юноши, предбедствующе, * царюющаго оплеваша повеление безумное * и, совокуплени имже, не сварипшася огнем, * Державствующему достойную воспеваху песнь: * Господа пойте дела * и превозносите во вся веки.**

Света ты мира соверши Отчь Свет, Слово Ипостасное, избравый апостола от мира, треблаженне, и, вооружив Божественною силою Своею, посла, яко оружника непобедима, вопиюща: Господа пойте дела и превозносите во вся веки.

Силою Божественною укрепляемь, апостоле, противныя полки победил еси, свирепое ополчение тех разрушив, мир бо неотъятный жребий взем, мирное устройство насадил еси миру, Господа воспевайте дела, вопия, и превозносите во вся веки.

Всею любовию прилепился еси воплощенному Слову Божию, апостоле, ученик Того быв, и Божий слуга, и тайноглагольник, отонудуже от Него послан во языки, проповедал еси Его пришествие, Господа пойте, вопия, и превозносите во вся веки.

Богородичен: **В**есь соединися паче разума неизменно всему человечеству Пребожественный во утробе Твоей, Всесвятая Дево. Темже во дву естеству знается Христос, един сый обое. Емуже, поюще, вопием: Господа пойте дела и превозносите во вся веки.

Песнь 9

Ирмос: **Бога человеком невозможно видети, * на Негоже не смеют чини Ангельстии взирати: * Тобою бо, Всечистая, явися человеком * Слово воплощено, * Егоже величающе, * с Небесными вои * Тя ублажаем.**

Ныне неизреченныя славы и света невечерняго сподобився, идеже неизглаголанное есть веселие, идеже радость непрестанная в Церкви перворожденных, идеже праведных селения, за вся христиане молися, Филиппе, всеумудре.

Украшен добротою умнаго благолепия и царствия венцем обложен, Богомудре, и богатыми светодаянии, Филиппе, просвещаемь пресущественнаго Света сияньми, радуясь, Владыки твоего Престолу, блаженне, предстоиши.

Со апостолы всеми честными, и пророки, и страстотерпцы, Филиппе, преподобными, иерархи и праведными, с Богородицею моли разрешение грехов многих и прегрешений дати очищение верою светоносную и Божественную память совершающим твою.

Богородичен: Воплощенно Слово, прежде безплотно сущо, Дево Мати, родила еси. Сего ради Тя, господственно Богородицу, вси благочестно славим, истиннейшее Тебе нарицание приносяще, Чистая, Ты бо верных спасения корень пребываеши.

Светилен:

Подобен: Духом во святилищи:

Течение красных твоих ног, Филиппе, возвратив, * к шествию Небесному возшел еси, радуясь, * и, Троице представ, во Отце видиши Сына и Духа Божественного. * Сего ради верою всесвященную твою и Божественную празднуем память.

Слава, и ныне, Богородичен:

Страшнаго испытания воспоминаю час, * множество бо дел моих ужасает и устрашает мя, * но ущедри, Пречистая, теплою Твоею молитвою * и даждь ми спасение: * елико бо хоцещи, и твориши, * яко Бога рождши, благословенная Марие.

На хвалитех стихиры, на 4, глас 8.

Подобен: О, преславнаго чудесе!

О, преславнаго чудесе! * Рыбы иногда ловяй апостол, * человек ловец бысть Богопроизведенный, * словес мрежею языки улови, * креста удицею мир возвлече. * О, какову ловитву Богу принесе Богоделатель! * Егоже память ныне празднуем.

О, преславнаго чудесе! * От Бога послан, посреде волков, яко овча, * небоязненно проходилаше апостол Филипп, * звери агнцы верою яви, * мир Божественно простихийствова. * О, дел веры! О, сил изящнейших! * Егоже молитвами, Христе, * спаси души наша, яко един Благоутробен.

О, преславнаго чудесе! * Кладязь, точащий жизнь мудростным черпанием, * сущим в мире бысть апостол Филипп. * От негоже струи догматов исходят, * от нихже чудес быстрины прием. * О, колика содея страшная чудеса Богоделатель! * Егоже память верою славим.

Глас 2. Самогласна:

Небесная чаша явился еси мудрости, * Духа бо показался еси обитель красная * и изрек еси добродетелей истину, * земныя уловив умною удицею мудрости Божия. * Тем молим тя, апостоле Филиппе, * молися о душах наших.

Слава, глас 3:

Рыб ловитву в человеку ловитву преложив, * сущия во глубине прелести * неводом извлек таинственным, * Филиппе апостоле, * весь мир уловил еси * и учителю твоему, Христу, привел еси. * Тем молим тя: * молися Ему непрестанно * спасти души наша, * верно творящих всечестную память твою.

И ныне, Богородичен:

Богородице, Предстательнице всех молящихся Тебе, * Тобою дерзаем, и Тобою хвалимся, * и к Тебе все упование наше есть, * моли Рождшагося из Тебе * за непотребныя рабы Твоя.

Славословие великое.

Тропарь. апостола, глас 3:

Благоукрашается вселенная, * Ефиопия ликовствует, * яко венцем красуема, * тобою просветившись, * светло торжествует память твою, * Богоглаголиве Филиппе, * вся бо веровати Христу научил еси * и течение совершил достойно Евангелия. * Тем дерзновенно варит Ефиопская рука к Богу, * Егоже моли даровати нам велию милость.

Слава, и ныне, Богородичен:

Тя ходатайствовавшую спасение рода нашего, * воспеваем, Богородице Дево: * плотию бо от Тебе восприятоу Сын Твой и Бог наш, * Крестом восприим страсть, * избави нас от тли, яко Человеколюбец.

И отпуст.

НА ЛИТУРГИИ

Блаженны апостола, песни 3-я и 6-я.

Ты, исполнен света деятельнаго видения, Свету великому, бывшу с нами, сподобился еси Христу служити, Филиппе Богоглаголиве. [Дважды.]

Степень догматов благочестивых твое тайноводствие благочестиво явися, тем бо Сына познахом соестественна и соединенна супца Родителю.

Свещник был еси злат, сияя человеком присносущный свет и просвещающ им вселенную яве познанием, Филиппе всеизящнейше.

Одержашу и губящую зря прелесть вражию человеческий род, Твоя стрелы, изошранныя апостолы, напряг, испустил еси и разверзл еси брэнная уста змиева, всех от того вреда и тли, Спасе, исцеляя.

Вышним сиянием блистая, явился еси, якоже молния, вселенней светя, и яко гора, сладость искапающая, яко роса Божественная, с Небесе падающая, яко апостол избран, дванадесятчисленный полк исполняя учеников Христовых, всеблаженне.

Слава: Научився Твоей тайны глубине, Божественный ученик, яко реку мира, наводняющую сладости поток, яко потопающую волну, славу языков, Тя проповеда велегласно и Твое славное истощание, Блаже, еже о нас благовести.

И ныне: Богородичен: Умерщвляемая и гибнущия вся смертию человеки Ты, Христа рождши – Нетленное Безсмертие, призвала еси к жизни вечней, и просветила еси омраченныя, и свободила еси, разрешивши узы отведения нашего, Всепетая.

Тропарь апостола, глас 3:

Благоукрашается вселенная, * Ефиопия ликовствует, * яко венцем красуема, * тобою просветившися, * светло торжествует память твою, * Богоглаголиве Филиппе, * вся бо веровати Христу научил еси * и течение совершил достойно Евангелия. * Тем дерзновенно варит Ефиопская рука к Богу, * Егоже моли даровати нам велию милость.

Кондак апостола, глас 8.

Ученик, и друг Твой, и подражатель страсти Твоя * вселенней Бога Тя проповеда Богоглаголивый Филипп; * того молитвами от врагов пребеззаконных * Церковь Твою и всяк град Твой * Богородицею соблюди, Многомилостиве.

Прокимен, глас 8: Во всю землю изыде вещание их * и в концы вселенныя глаголы их.

Стих: Небеса поведают славу Божию, творение же руку Его возвещает твердь.

Апостол к Коринфяном, зачало 131.

Братие, Бог ны посланники последняя яви, яко насмертники, зане позор быхом миру и Ангелом и человеком. Мы убо буй Христа ради, вы же мудри о Христе, мы немощни, вы же крепцы, вы славни, мы же безчестни. До нынешняго часа и алчем, и жаждем, и наготуем, и страждем, и скитаемся, и труждаемся, делаяще своими руками. Укоряем, благословляем, гоним, терпим, хулим, утешаемся, якоже отребим миру

быхом, всем поправление доселе. Не срамляя вас сия пишу, но якоже чада моя возлюбленная наказую. Аще бо и многи пестуны имате о Христе, но не многи отцы, о Христе бо Иисусе благовествованием аз вы родих. Молю же вас: подобни мне бывайте, якоже аз Христу.

Аллилуия, глас 1: Исповедят Небеса чудеса Твоя, Господи.

Евангелие от Иоанна, зачало 5.

Во время оно, восхоте Иисус изыти в Галилею, и обрете Филиппа и глагола ему: гряди по Мне. Бе же Филипп от Вифсаиды, от града Андреова и Петрова. Обрете Филипп Нафанаила и глагола ему: Егоже писа Моисей в законе и пророцы, обретохом Иисуса сына Иосифова, иже от Назарета. И глагола ему Нафанаил: от Назарета может ли что добро быти? Глагола ему Филипп: прииди и виждь. Виде же Иисус Нафанаила грядуща к Себе и глагола о нем: се, воистинну Израилтянин, в немже льсти несть. Глагола Ему Нафанаил: како мя знаеши? Отвеща Иисус и рече ему: прежде даже не возгласи тебе Филипп, суца под смоковницею видех тя. Отвеща Нафанаил и глагола Ему: Равви, Ты еси Сын Божий, Ты еси Царь Израилев. Отвеща Иисус и рече ему: зане рех ти, яко видех тя под смоковницею, веруеши, больша сих узриши. И глагола ему: аминь, аминь глаголю вам, отселе узрите небо отверсто и Ангелы Божия восходящия и нисходящия над Сына Человеческаго.

Причастен: Во всю землю изыде вещание их и в концы вселенныя глаголы их.